

Naqqiut

Saqqummiussissut 9. august 2023-imeersoq taarserpaa
(Naalakkersuisup taaguutaata allangortinneqarnera sularineqarpoq)

Kalaallit Nunaanni pinerluttulerinermik inatsisip aamma Kalaallit Nunaanni eqqartuussisarnermik inatsisip allangortinneqarnerat pillugit inatsisissatut siunnersuutip (Digitaliusumik innarliisarnert akiorneqarnissaannut suliniutit, matumani isumapiloqarneq tunngavigalugu tatiginnilersitsiniaanerup, grooming-ip, inerteqqutinngortinneqarnera, meeqqamik atoqateqarnerup pinngitsaaliinnermut naligiissinneqarnera, malunnaarsaarluni atoqateqarneq, upperisarsiortut aqutsisuisa atoqateqarniarlutik inuup pisariaqartitsineranik imaluunniit pinngitsuuisinnaannginneranik atornerluineri il.il.) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigissaattut siunnersuut

(Inuutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Saqqummiussissut

(Inuutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Kinguaassiuutitigut innarliisarnernut suliniuteqarnerit sugaluartulluunniit pisariaqarluinnarput annertuumillu pingaartinneqarput. Innarliinerit pisarnerinut periaatsit, inuiaqatigiit ineriartornerat malillugu ineriartortarput, aamma ullumikkut internettikkut inuit akunnerminni naapittarnerat aamma atassuteqarnermik digitaliusumik pilersitsisarnerat nalinginnaasorujussuuvoq. Kisianni naak akuusut akornanni timikkut atassuteqarneq pinngikkaluartoq, nalunngisatsit taamaaliortarneq aamma ajortumik atassuteqarnerit aamma innarliinerit pilersinnissaannut atornerlunneqarsinnaavoq.

Kinguaassiuutitigut innarliinerit, aamma taamaaliornert internettikut pigaangata, akiorniarlugit suliniutit patajaallisaavigineqarnissat siunertaralugu inatsisissatut siunnersuut manna saqqummiunneqarpoq.

Taamaammat inatsisissatut siunnersuut inatsisinik atuutsitsinnermut suliassaqarfiup nutarterneqarnissaa pillugu, taamaalilluni sunniuteqarluartuuniassammat ullumikkumullu naleqquttuuniassammat, suliat ilagiinnarpaat. Inatsisitigut naapertuilluartoqarneranik misigisimanermut tamanna nalinginnaasumik pingaaruteqarpoq, kisianni innuttaasut atornerlunneqarnissaannut innarlerneqarnissaannullu illersorneqarnissaat pineqartillugu immikkut ittumik pingaaruteqarluni. Digitaliusumik isumapiloqarneq tunngavigalugu tatiginnilersitsiniaaneq, grooming, pillugu pinerluttulerinermi inatsimmi aalajangersakkamik pinissaq Naalakkersuisut pingaarnersiunerminni salliutikkaat, 2022-ip aallartinneranili Naalakkersuisut qallunaat naalakkersuisuinut nalunaarutigaa. Tamanna politikkikkut

atituumik tapersorneqarluni aamma Inatsisartut kissaateqarnerisigut pivoq. Piffissami tassani aalajangersagaq taamaattoq qallunaat pillaasarnermik inatsisaanni nassaassaangilaq. Upernaaq manna tamanna aatsaat akuersissutigineqarpoq.

Digitaliusumik isumapiloqarneq tunngavigalugu tatiginnilersitsiniaaneq, grooming, pillugu aalajangersakkap saniatigut pinerluttulerinermi inatsimmi kinguaassiuutitigut innarliinerit pillugit kapitalimi nutarterinernik arlalinnik siunnersuut imaqarpoq. Takku pingaarnertut meeqqanut inuusuttunullu tunngatillugit atuupput.

Meeqqap 15-it inorlugit ukiullip inummik 22-ileereersimasumik kinguaassiuutitigut atassuteqarnissamik akuersissuteqaqqaarsinnaannginnera pillugu aalajangersakkap ilanngunneqarnissaa pillugu siunnersuut, immikkut ittumik erseqqissaatigissavara. Naak akuusut isumaqatigiikkaluartut, pisuni taamaattuni siunissami pinngitsaaliineq pineqassaaq.

Ataatsimut isigalugu, inunnut meeqqatsinnik inuusuttatsinnillu atonerluisunut aamma inuttut kiffaangissutsimut killissarititaasunik qaangiisunut, pisariaqartinneqartunik qisuariarnissamut periarfissat qulakkeerneqarnissaat, Naalakkersuisunut pingaaruteqarpoq. Kinguaassiuutitigut innarliisarnerit akiorniarlugit aamma inuit allat atonerlunneqarnerannut periaatsit nutaat pinerluutinngortinneqartarnerat pillugit sulineq ingerlaannassasoq Naalakkersuisut takutissallugu taamaammat kissaatigaat. Tamanna stealthing-ip oqaatitigut imarisaa pillugu, tassani usuup puuata atoqatiginninnerup siuntsiannuani peerneqarneratigut inuk alla napparsimalernissamut imaluunniit naartulernissamut navianartorsiortinneqarluni, qanoq isummernissatta paasinarsisinneqarnissaanik ilaatigut kinguneqassaaq.

Taamatut oqaaseqarlutik immikkoortup Inatsisartuni suliarineqarnissaanut Naalakkersuisut tunniuppaat.